

K e t o r è s z e l k u o r i a u s š o k è s

P è r m u o j i

Aš parēsio, ka neblauksi ēr nebšauksi.
Ka čežies sostērēs čiesos ajieras.
Ka po kuojiems bērs tik spalē auksos,
Bet i širdi lēpta nebatras.

To dīvuosis – tīkē kāp budīniuo.
Tiktā gerklē kažkas katoliou...
Ēr ni pats nejusi, ka prēmīnē
Vardus, kor nobiega patekliou.

Tebibūs tēp pat. Bet pasēruodīs,
Ka tik retiū kaktuo dēdlē daug...
Ont kelalēs, grēistās tava žuodēs,
Vēn tik osnis ēr balondas aug.

O n t r u o j i

To paveiziesi, bet nesoprasi –
Ēivū žēidelēs sning i pat plaukus!...
Kuožname mona širdi atrasi...
Jeigo tuo būsi čīra solaukēs.

Dongus – i kliebi...Saulē – pri kuoju...
Tiktā pavierīk – gal juk tēp būtē!..
Vo ta nedielē jau pastaruoji –
Senē bebova viejē tēp pūtē!..

Vedo priginsiau līto ēr vieji...
Abruozda vēina kraujo paišīsia...
Vēskou, kam širint nebier nadiejēs,
Naktēis padērbtē dēina prašīsia.

T r e t i u o j i

Tež par stēkla saulelē –
Šašoulietē tīst i skrēta.
Ēr dongos notop pri kelē,
Katrou tēik metū ēto.

Katramē dēlst mona pēdas –
Stēipas i vēršo tik lēipas...
Prapol rūpesnē ēr biedas,
Tiktā līdekā palēipos:

Akminis štīvē – nepova –
Prīšakie monēs rēitiejē...
Vo tavēs nier!... Je nebova,
Ka vēso nuogniausē reikiejē.

Ketvērtuoji

Tava akis līn i mona longus.
Žuodiū kvietkas bērst mon ont krūtēnēs.
A tik dēl tuo īr tas vakars brongos,
Ka jau kēts bebus tik po Žuolēnēs?!

Bet juk gal tuo kēta ēr nebūtē:
Vies jau kēlst...Ēr šaltis svēlēn kaulus...
Ne rodou – tik pradē tier rogpjūtē!...
Nuors jau beveik nebier dongou saulēs.

Tad ēr ruoduos – dziegorē be balsa
Gen aplinkou tuoki pēlka čiesa!..
– Bet, žēnau, – ruodīkliu neprikalsio,
Nuors ē dēdlē dēdlē tuo nuoriesio.

Kažkas būs... Bet geriau nežēnuotē.
Neregietē ēr nejostē nieka.
Eičiuo tuo, kas bova jau, ēiškuotē...
Bet ka sīluos etē jau neblēka.